

國
朝
詩
鐸

國朝詩鐸卷十

錢唐張應昌仲甫

刑獄

湖天霜

葉燮

湖天湛然青盛夏飛嚴霜嚴結陰慘白日沈荒涼厲
鬼啾啾鳴行路聞心傷埋冤爾爲何毅魄非國殤生爲
蚩蚩民安分柔且良真盜失伏辜漁人罹禍殃殺人不
抵死袖手反代償有耳非不聞有眼詎失芒一人愛功
名片語進斧斤邈矣三宥仁孰察五過章一朝四百指
駢首堆荒岡湖水自終古流恨徒湯湯寄語司牧者殺

人宜慎詳

沈婦恩曰殺四十人以全一人官爵天

哀東獄

山東州縣獄卒率以緝版拘囚人於夜不

金植

哀東獄獄卒狼纍囚一入成壘粉東獄法版爲牖夜夜

牖人儼羅刹爾罪輕爾罪重總加牖版僵難動獄卒怒

囚殼觫上天下地兩局促始信人間有地獄古者拘囚

爲犴牢但嚴守視園牆高獄卒夜臥圖逍遙動輒藉口

防逋逃烏虜獄卒藉口防逋逃不聞獄中夜半聲嗷嗷

私刑惡

鄭燮

官刑不敵私刑惡掾吏搏人如豕搏斬筋抉髓剔毛髮

督盜搜贓例苛虐吼聲突地無人色忽漫無聲四肢直
游魂蕩漾不得死宛轉迴甦天地黑本因凍餒迫爲非
又值姦刁取自肥一絲一粒盡搜索但憑皮骨當嚴威
纍纍妻女小兒童拘囚繫械網一空牽累無辜十七八
夜來鎖得隣家翁隣家老翁年七十白髮長椎敲更急
雷霆收聲怯吏威雲昏雨黑蒼天泣

閱囚籍有感

沈德潛

報囚當秋月囚籍何紛紜貪盜與淫殺一一乖常倫皆
繇有餘怒唐帝無哀憐何爲郅隆代千紀多莠民閱實
故其罪鍛鍊或非真太寬失刑憲太密防銜冤死中求

一生全憑寸心仁求生百不得此心庶可捫那敢恃聽
察視人如雞豚取快祇一時應計子與孫願體三刺意
毋虧 聖人恩

恤囚吟四首

囚應死於法不應死於吏吏非必有死囚之心而約束不嚴體察未周以致

致飢寒無可告訴疾病莫與醫療化作青燐者衆矣姚邑監獄數十年來未加修葺字傾頽屋舍低小衆犯共居一處溼氣熏蒸疾病間作囚之孱者往往莫救嗚呼囚不以罪死是誰之過歟爰請上官發帑鳩工改舊識數言自警亦以告後之典獄者

李化楠

一入圜扉絕可憐求生何計死徒然諒難三宥全開網
空有千愁孰解懸吏卒無情呼黑獄妻孥有淚滴黃泉
傷心久罷團欒夢況是飢寒疾病連

蓬頭垢面死爲隣風雨淒其十二辰棘樹陰森連鬼國
殘燈明滅伴愁人存亡就裏機關巧倚伏從中仔細論
莫使伯仁由我死霜臺卽此是陽春

治獄非難斷獄難罪人生死寄毫端死如有恨冤何已
生果能求寢亦安望斷家山音信杳威尊獄吏骨毛寒
緒長緒短均成淚忍作從旁冷眼看

切骨嚴刑痛莫支况逢暑溼並蒸時言多不盡憑誰說
病到垂危只自知獄繫十年灰已死冤成一字案終疑
叮囑此際須詳愼頭上青天那可欺

刑名

查禮

國朝言金 卷一
刑政屬秋官掌於大司寇圖土居罷民其網疎不漏教
善使自強從新以革舊不改而後殺方可表仁覆好生
德體天古聖每三宥

粵稽蚩尤刑桀鯀與剋則唐虞存其名而未有其罰因
知肢體戕所辱甚於殺立法如穽深一陷不可拔今求
省刑書律嚴例毋忽

收孥與赤族漢魏並遵秦徒流繼管杖李唐爲近仁一
人向隅泣滿堂俱悲辛維彼獄吏尊囹圄作陶鈞儀辨
俗自安刑中民自新

固原趙秀才 平冤獄也
爲固原吏目張傳心作 蔣士銓

赭衣囚首蹲階下劇盜誰何秀才也秀才手無縛雞力
身無破空翻頭髮髮三寸鼻涕長一尺焉能爲盜拒伍
伯徧體銀鐙餘骨立妻來橐夫饅子來牽耶衣人鬼關
門但一紙死生呼吸微乎微倖州者誰張傳心目光炯
炯秦鏡臨秀才無罪解縲紲縱囚歸理書與琴明日街
頭縛真盜秀才痛哭千人笑可憐覆盆之下豈無人焉
得陽鳥同一照

折遇蘭誣賭行見捕捉門

示屬吏

凡應發新驛改遣內地者配所脫追捕得
卽斬例也然犯者時有乃飭所司俾治本

業爲衣食資并申明律令各懸銅牌
鐫逃者立斬四字庶觸目警心焉韋謙恆

去惡法必嚴矜全意逾至。一綫苟可生邊隅俾安置蚩蚩真愚氓稍縱迺逝火急追捕亡既得那可貴譬若池中魚荇草足游戲一躍思江湖翻入枯魚肆嘉彼良有司頻爲饗飧計作息安其天狡脫更何爲奈無廣長舌時時警聳聳不如藉頑金鑄以律令字使之佩終身優游於盛世

仁人

趙嘉程

仁人能愛惡以惡全其仁豈不重生命。所棄止一身。倘或事姑息所惡已不真尙恐肆大惡竟至傷彝倫我心匪上智我意本和春大義有當斷大法有宜遵此理既

無歉神明存乎人

永新獄

姜 曦

殺人者死罪無赦煌煌憲典誰不聞五聲之聽在聰德
高下出入毋紛紜伊昔雜診漢遺法變鬪殺傷冤必伸
迄宋宋慈權臬事洗冤集錄諸家言驗毒有法用釵探
証以爪甲及齒齦越元王與海鹽令別釵真偽妙義申
銀釵足色變黑色擦洗不退爲毒真自元迄今四百載
守之弗替如典墳更有虛弱身卽死屍身弗現青黑痕
以釵探視果變色仍以毒論無可原別說檢毒視骨色
毒否以骨黑白分毒輕毒重概勿辨矛盾驗法何足云

咄哉余治永新獄朋謀下毒羣奸民裝傷矇驗狡誣賴
衆口附和如犬噬如法視驗毒乃現質究屍屬及伍隣
共吐明白首從判幕胥交搆大吏噤置釵勿問謬詰駁
慘令死骨遭蒸爇教囚翻異縱囚出如縱虎逸放蛇奔
詎知冤魄現白晝羣奸陸續亡其身從來果報不足道
茲事親歷非無因

按寶山李保泰撰嘯墓志曰君習法

邑人許青奇謀死胡華國事起許欲佔吳方谷山場會
吳與胡以門歐架訟許謀毒死胡嫁禍于吳而微利之
君往驗視如洗冤錄法以銀針深喉盡黑因盡發其謀
毒情事具讞詩以三千金行賄君斥之因別爲道地而
詳讞之交頓却主謀者竟無
恙君賦永新獄一篇紀其事

終訟謠

余讀湖南志載宋陳桂孫之言曰閭里間
頻歲凶幸不死於訟死於饑嘻楚之好訟

自昔已然人知饑而死不知終訟之凶亦足以死也作此以諷之祖之望

有犬猶猶投骨而爭獄以象之人而獸行

說文獄從犬言

汝

有兄弟如足如手汝有姻婭如賓如友胡不相能而相
藥媒汝適自裁人共汝哈凡人有過苦不自知胡不自
訟而訟人爲天之降凶饑可得食汝乃不惠自矜詐力
瀕死弗悔悔將何及維楚有田聯阡絡陌其側爾田其
宅爾宅歸告而父而長而兄睦婣任卹樂茲昇平

吳童冤

趙懷玉

吳江城高矗矗民之無良聚爲族小兒往往恣摧殘父
母聞之不敢哭縣官單騎收諸兒肢殘骨斷哀兒童生

者那可續死者狼藉餅壘中縣官怒究根株始三窟蟠
根連浙水飛檄交馳大吏聞浙人欲生吳欲死此事傳
聞吾未睹人縱可欺天亦怒明律難寬兩觀誅渠魁僅
遣三邊戍可憐縣官民覆翼一朝反被交章劾原情幸
有聖明知九重特下除官敕獨有吳童身莫贖牧民
之義今安屬同是提攜捧負恩忍令盛世遭魚肉君
不見東海灘頭濁浪奔靈旗翻處祀抽筋天中蒲酒中
秋月歲歲祠前賽似雲

崇川縣門敞

戒興訟也

客通州作

又

縣門敞州門寬入之易易耳欲出殊艱難一朝之忿投

片紙兩造虛詞互相抵寃非覆盆甯待理中人十家產
如洗君不見南山有飛鳥羽毛怕人觸訟縱能申身已
辱縣門州門休厠足

過嶺十首

去粵臬任時作
所言多刑獄事

姚祖同

回首繁華地名都壯海濤明珠輕蕙苴孔雀抵家禽信
矣民生厚猗歟帝力深永懷唐魏儉庶以節滔淫余

游所至物阜俗華無踰是邦者
國奢示儉是誠在良民者矣

嚮利貧何擇輕生詐亦愚如何鑒誣服翻遣受刑誅縱

任封狼逸奚煩窮鳥拘未知賢守令詳省檄文無潮州等處

頂兇之案貧民受雇代戮有至死不悔者亦有受愚尋
悟者地方官概不加察迨到省覆訊得實檄提正犯州

縣斷不肯批解發回另審亦不肯更正無非宕延拖斃
冤上加冤余檄商守令革其弊欲使民命不枉而州縣
亦寬其處分去任
時尚未得覆文也

訴恨塵封牒爭雄甲在門俄然蠻觸鬪終快虎狼吞佩

犢思醲化還珠有治源徵兵何擾擾雞犬盡諸村潮州屬

械鬪之案昔聞其積習幾無治法及到粵體察實情乃

知好勇鬪狠固屬蠻方常態亦由長吏訟獄未平小民

冤忿莫釋以致自相仇殺其糾衆械鬪皆預先定期可

以勸導禁遏無如鬪冗之吏昏然不知其貪酷者更利

有案到官藉以羅織富戶亦知而不禁也強宗悍族庇

其罪人請兵下鄉要其縛獻乘勢抄掠禍及比閭由是

頃兇拒捕禍端紛起正

本清原治之固有道矣

抵法容留養爰書寓赦書推恩原 孝治鬻獄到奸胥

網漏紛如戲盆冤雪亦虛敬敷 欽恤政豪猾在先除

任內州縣具報死罪留養之案查出虛捏者二十餘起
均請請奏辦猾吏作奸壞法至此若不究懲憲典安在
秋讞刑無赦猶聞一綫原豈知收繫酷下有積屍冤榜
掠從胥吏瘡痍逼瀾藩驚心民命重按部忍無言粵東秋審
情實重案不過百數十起而每歲干証拖連以及輕罪
淹斃者常至數百命州縣報案無日無之其中問官之
拷掠獄卒之凌逼飢寒病瘼無所不有此外盡役私設
班館恣用非刑妄拏私拷斃命不報者尙不在其列無
形之誅戮始數倍于秋審勾決之犯矣余通檄嚴查究
辦未竟而去後有慈惠之師將扇祥風而除虐獄此爲
先務矣

國法無中外華夷凜禁防不聞推刃罷坐遣挂帆颺披
愬冤難雪睚眦勢漸張重城森列戟排闥敢跳踉余視
初有以此舊案陳訴者兇夷已遁同本國久矣犯隔重
洋案經奏結無可措手爲之憤恨夷情本多奸詐近益

疏視禁防亟
宜講求駕馭

安民先弭盜薦贖重梟渠豈意千金購爭同奇貨居園

扉催比附雲路藉吹噓刑賞歸忠厚凝思慘不舒州縣委員

拏獲盜案例有議敘如審有斬梟重罪多人則破格保

薦各省皆然粵東尤重州縣補缺署事至另設獲盜班

海疆重地原以整頓捕務而行之日久流弊滋多賄買

情託無所不有人人視為捷徑惟恐殺之不多且速也

間有疑似之案一經覆訊虛誣則謗讟譁然以不肯

迴護妨其保薦也惡習喪心豈復知哀矜勿喜之意

用法惟平允矜疑或在寬頻間參重典毋乃慕周官獮

俗看稍息刑章豈不刊恭惟 休養澤民氣怕傷殘周禮

刑亂國用重典非治平常法也粵省刑律有加重各條

當時或因盜賊鴟張民情獷悍權宜懲創非可奉為典

要今獄訟漸稀盜案日減與昔迥異似宜
改遵定律毋庸加重余曾為大府言之

會匪盈山澤名同實不倫會常牽善類匪乃盡奸民憶

昔邪氛靖羣欽 廟署神驅除兼解散成法台遵循

粵東

會匪之多各縣各村皆有為首者自係詭詐兇悍之徒
次亦糾人搶劫非安分者而亦有懦弱平民或族姓孤
單慮人欺侮希入會後有恃無恐亦有貧乏冀同會助
喪葬紛紛關入不可勝計皆為匪徒勢動利誘也甚至
生心覬覦良善富戶強之入會拒之則立時搶劫一經
給錢入會幸保身家迨匪徒等犯案株連有口難辯胥
吏乘機訛詐拖累無窮閭閻被擾驚惶往往激而滋事
此皆入會而末為匪一以會匪目之過矣愚意宜拏為
匪之人而不必問在會與否如其凶惡滋事雖未入會
亦所必拏如其安分馴良雖入會亦尚可恕蓋拏匪
而不拏會則奸徒不能漏網而良善足以保全辨匪而
專辦會則平民多被株連而兇徒得施扳陷粵東界連
粵西江西湖廣數省會匪盈千累萬此拏彼竄不可究
詰因循誠慮養癰而籌辦不可不慎憶昔川陝楚邪匪
滋事時數十萬人誅不勝誅其後朝廷勦撫兼施設
法解散遂致平定夫會匪之不皆為匪亦猶教匪之止

燒香喫齋者不皆倖亂也
辦理機宜所當熟計

一攬秦關轡重抽瘴海帆未成歌菱舍翻遣費聖函殖

患嘉禾損鋤難惡蔓交繡衣吾懔懔輕便是征衫余任陝臬

五月任粵臬九月

施州劫礮火慎拘提也野處之民土姓十居八九樂府劫礮火差役拘提有被攔截者謂之劫礮火

詹應甲

劫礮火牽者在前挽者左十步右十步跛中有一人
手帶鎖兩山夾欄聲喧逐亂石紛如冰雹來釋彼甯家
聽汝回汝不肯回同曳去磨墨伸紙捉書據汝自縱逃
官不怨役歸白官先受責官怒添差差失色大索十日

竟不得爲言陰礮不與陽礮同赤腳蠻婦頭飛蓬劫之
不勝婦轉喜背負嬰孩擲地死汝命不能償我子吁嗟
乎胥役神奸本出奇遇此伎倆無所施若非拘之不得
法定有里甲爲把持欲滅其火風倒馳試看怒雷不作
青天時

施州樂府
雀穿屋
飭刁袴也

又

雀衣青青雀頂白自磨其角手加額從此有司偏愛惜
何況學官不我責公堂認作雀兒窠甘爲旁人屈膝多
不向空城求粒食慣從平地起風波一波未平一波起
雀噪可憎雀自喜別有雀豹據雀巢羣雀畏之不敢抵

公然鷹搏吸鵝膏甚且鴉奔斷雞尾不思感悅早驚龙
忘却整冠先礙李豈知法網總難寬禡去鴟冠憑一紙

下鄉決訟諭民詞

嚴如燈

山民質敦樸風俗本來淳自從蕩搖後良莠雜齊民流
徙無根蒂葭莩盡姻親越畔怒咫尺負債憤杪分鬪狠
肢甘廢逞忿目怒瞋潑油詢地主開花連族鄰班長齒
牙利捧檄雷火奔半途拘野店保舖羈城闔口岸錢屢
貫草鞵費幾緡牌懸伺質訊高衙聽鼓振青天蓋一尺
膠葛斷難遵兩造混黑白曲直誰爲申羈久賸皮骨息
狀投中人虛誣不敢坐自首咎有因無辜坐受累抱屈

那得伸可憐供魚肉一案十家貧無訟古所難化理慚
守臣當衙語訟者抱牘且歸耘四境吾庭院匝月再周
巡林陰足憩息寺廟亦安身芻蕘橐先具供給不煩勤
按轡周村落團練成一軍外以捍寇盜內以息紛紜邪
慝未易除爬搜不嫌頻商自安爾市農自服爾畛階下
擁兒童案頭環耆紳快爾雪冤意慰我求瘼殷我聞刻
木吏對之尙稱神又聞搖金舌聽之不厭諄此邦周南
舊穢德貴能新免冒武夫化喬木貞女純匪彝勉相戒
王道其遵循自注山民土著質樸不輕構訟流徙來者
爲新民鼠牙雀角輒成訟端訟師唆之互
控不休凡訟師株連人有打破油簍詢地主之語又山
民稱差役爲班長藉案牽累曰開花奉差喚人多押途

中至城中又另羈保舖官常不知差役詞證共食保舖
中爲口岸錢差役至訟家索資曰草輟錢舖堂挂牌皆
訟常規山民訟棍上堂輒稱一尺青天蓋尺地訟久不
決兩敗俱傷取息而散山民常言官司沒有打斷只有
和斷官於誣告棍徒不能懲治輒日到案卽行自首姑
寬免究時下鄉團練諭以四鄉每月各五日就近理詞
訟示又字條約外
拒流寇內除白役

司園雜詩

八首
錄六

李鑾宣

我生素貧賤年年苦饑寒前年爲博士去年作都官今
年治刑曹其職惟司園黑海浩無底豈見波與瀾纍纍
衆囚徒鐵鎖行蹒跚中更十數人虛懸梁棟間尻旣不
著地頭亦難觸藩奄奄僅一息身無寸膚完斯刑一何
酷悽惻不忍看急呼吏胥至減之毋作奸用脫其桎梏

稍覺心神安王者有五刑原以除凶頑矜彼亦人子罹
法良可歎哺之以糜粥臥之以草莞衆囚俛首泣我亦
摧心肝

初日上短牆役夫起炊爨飯熟舁竹筐親爲衆囚散啟
鑰出衆囚銀鐐繫頸腕十十與五五先後走魚貫一人
飯一盂吏胥盱以悍黠者稍滿孟癡者僅得半我欲防
其奸一一過眼看偶然入口嘗不覺興浩歎天庾萬斯
箱廩米白以粲此亦太倉粟何故獨糜爛囚也前致詞
廩弊待君判猾吏肆剋剝煮飯不以炭敗薪雜馬糞燃
火火不煖及至將熟時先用冷水濯濯之亦何爲一粒

兩粒算聞言心惻然官儒法必玩

炎夏日苦長汗出多於漿滿室飛青蠅噉啗不可當入

夜更偏仄豹腳蹲如狼飢蝨曳修尾

獄中壁蝨俱有尾

吮血同

嚙瓢罹此縲紲苦欲睡且無鄉爾囚夙何孽四顧徒俛
俛呼囚出廡下命吏掃其牀掃牀更掃屋箕箒齊簸揚
冰泮貯新冰茗椀茶烟颺熏以松柏枝雜以蒼朮香安
得須菩提法雨注慈航三千大千內世界皆清涼

冬日又苦短階前百草枯朔風卷寒雪屋角狂飈呼嗟
爾獄中人戰瘰傷飢膚單絲不被體裸立如枯株亦有
垂死者僵臥久不蘇典守我之責此事當急圖筆札求

友生金錢爲囚輪百錢買一袴千錢買一襦鋪草盈其
牀爇炭充其鑪凍者於我衣餒者於我餉沃喉先薑湯
饑腹轉轆轤鬼伯亦爾憐入夜聲歔歔

謝傅曾有言春秋多佳日嗟哉園上中累囚環一室春
則癘疫滋秋則寒氣冽鞭扑膚已傷往往易罹疾老婦
與嬰兒株繫尤宜恤豈無官醫來一診事已畢我爲市
棧苓我爲買芪朮鍊蜜如鍊珠點膏如點漆每日日出
時親引病者詰給藥病或瘥不敢委役卒雖乏上池水
亦是仁者術惻隱人之心皇天憫蟻蝨

皇天分四時春生必秋殺欽哉恤惟刑民隱細推察罪

人入囹圄參養均草蔡彼亦有妻孥夢寐空空竄竄君
恩許相見相見悲攀曙月進期以二每月初二十六二日例許重四家屬
入宿謂之孽芽再萌茁大澤如江河支流衍澎汜治法
進家屬
須治人此地豈羅刹

諭訟師

陸王書

四民之中士爲首品行文章貴兼有今之學者吾不知
不爲經師爲訟師訟則終凶豈不聞強顏藉口因家貧
貧也非病何足恥胡爲務此喪行止莫謂小節何所妨
須知孽積天爲殃文人之心獄吏筆機巧變詐那可當
愚民雀角逞小忿輒復從旁授以刃百計誘之騎虎背

欲下不能惟我聽。遂令親戚成仇讐。甚且同室操戈矛。
戶婚曰土細小。故經年累月猶不休。始猶暗中作長城。
繼而出面爭威名。訟者厭訟求息事。於中猶欲爭輸贏。
可憐家業已傾敗。訟牒勾稽還未艾。訟師偏作壁上觀。
心在局中身局外。忽來長官動案牘。惟日不足繼以燭。
每事必欲究主使。按名查拘籤不宿黠者免脫免。此身
愚者逡巡繫以繩。輕則戒飭重羞辱。重則牒學覈膏衿。
吁嗟十載寒牕苦。甘蹈刑章遭夏楚。區區蠅頭利幾何。
斯文掃地實自取。我見此事輒愴神。此身同是膠庠人。
胡勿廉隅知自飭。束躬圭璧爲儒珍。自古祿在學之中。

悔尤能寡豈終凶幸毋陷溺不知返苦口兩耳仍如充

獄獄示牧令

葉紹楨

爲惜民勞合少休蒲鞭治術賴賢侯斂才始免才爲累
兼聽還虞聽未周越俎漫誇庖可治刻舟終恐劍難求
職思無忝談何易莫更輕爲出位謀

治到爰書獄已成蠻方端合驗輿情敢因止辟輕言辟
尙恐求生未得生民有怨咨難謝責律多疑似貴持平
圓扉草滿推循績願上春臺答 聖明

固原 樂府 趙秀才

雪人冤也

爲固原吏目張傳心作

周有聲

固原州賊多暴我翁治之民服教家大人曾安人何必

有奇謀弭盜惟當弭眞盜越數年後張公來奸役捕盜
捕秀才秀才但能勦文字何能攫奪爲奸頑目瞪口噤
不得語公以色聽明其冤草堂花開酒正熟秀才歸來
喜還哭插花置酒拜公前公位在堂無敢瀆古人縱囚
囚聽約張公縱賊賊就獲聞道此州誇好官我翁去後
張最賢

洪州
吟 珥筆民

羅 安

害馬去羣畜甯根莠鋤嘉禾植奈何容此珥筆民擾我
黎庶安有極置身列在四民外城市作家但游食操術
不慎利傷人淬厲筆鋒成霜鏑一部律例爛胸中興訟

起獄巧羅織教猱升木無不爲變幻請張亂曲直懇冤
眞若切肌膚索瘢並不遺罅隙詐譖案牘滿公庭欺罔
法吏等戲劇嗟此善良民畏法常惕息一朝被誣枉噤
口訴不得焉得長吏如神明冰鑑高懸燭奸慝安邦首
在安善良若輩直須屏四國

嶺南樂府買兇

殺人者購二人代爲抵罪名曰買兇雖茹刑亦不吐實

樂 鈞

富兒殺人走亡命貧兒受賂頂名姓甘心性命輕鴻毛
雖有于張訟難聽頭顱賣卻值幾錢價高不過三百緡
妻孥得此暫溫飽餐刀伏鎖無冤言東市雲寒日色薄
臨刑猶自念餘橐北邙山下紙錢飛何處青蚨買朽索

富兒生益富，貧兒死終貧。貪夫徇財，甯殺身錢能使鬼還通神。

嶺南樂府造餉無賴乞丐往往殺人移富者之家索錢而寢其事名曰造餉又

羣丐殺一丐嫁禍多牛翁多牛雖吝不敢吝金錢如土，傾囊中丐不披堅不執銳，公家糧餉何由致？殺人得錢身晏然，此是乞丐造餉計。夜埋死丐深谷裏，燐火熒熒哭冤鬼。乞兒從此非乞丐，飯籬貯金返鄉里。金隨手盡更無賴，故智欲行前事敗。吁嗟狡獪胡可長，縛向市曹償業債。

嶺南樂府械鬪鄉民持械聚鬪閩之漳泉爲甚粵亦時有

又

執戈不關衛社稷磨刀不爲殺盜賊蝸爭螻戰嗟無名
其膽千奴死不惜或爭邊陲比吳楚或有違言似鄭息
可憐口舌生戎兵頓與村隣作仇敵鬪有強弱無勝負
殺傷抵罪各如數彎頸極足囚纍纍官法豈能少寬恕
近時川陝餘寇氛搜原剔藪勞官軍何不奮身備行列
疆場血戰求功勛死綏死賊得死所械鬪之死彌冤苦
官長教令聞不聞各保身家和四隣

鄧撫善政婦妊身 明疑似也

宋翔鳳

婦妊身夫繫獄閱月十有二生男始臨蓐無何夫沒隔
數年叔欲出嫂控詞甚堅過期生子俗所異問者難決

心徒憐婦悲哭兒亦嘯一時堂皇間紛紛歔歔不可齊
公乃出問其叔爾嫂無外遇平時信親族證嫂不貞者
惟爾一人獨例不得出汝嫂財不得入汝手汝旣覲然
列衣冠甘爲誣鱗增家醜此人聞之媿流汗始據醫書
與剖斷驚憂恐懼孕過月況復其夫正臨難折以事理
引以書斯婦乃得攜子歸安居有斷斯獄者亦當細細
爲爬梳

又
脫營卒 平反寃獄也

又

南鄭有營卒與甲小嫌無大隙平時里閭復往來共聽
鬻弄長街夕兩人舊憾亦已細某甲還家三日斃妻孥

疑惑訟縣庭官吏粗疏罪先蔽遂認置毒在餽飪賣者
見者言鑿鑿誰知三刺變供詞漸覺衆情殊閃爍更審
營卒詞買藥毒鼠信有之至於謀害情實未有此事奈
賣餽飪者所言堅不異因呼賣者前爾日所賣幾一日
約有二百枚買者可能一一指不能一一指汝何獨能
識此卒詢以此言詞理屈命加榜笞叩頭陳縣役教之
使妄捏還詰隣婦及甲妻始吐實情乃可追數日前爲
瘈狗噬鬻未得效心狂迷迫是夕歸病增篤逾日不治
如中毒醫者至事方釋脫營卒罪縣役

亭衣篇

獄訟繁興上官持法苛細風雪中亭衣
戴路皆牘中牽連經歲不得歸者也

陳文述

朝見苧衣人躑躅府中趨暮見苧衣人瑟縮旅中居問
爾胡爲來羽檄催朱符問爾胡不去案牘方齟齬問爾
來幾里水陸郵程俱問爾來幾日歲月寒暑徂地或千
里遙期或經歲餘何曾扞法網贖尾牽連書雪消已見
曉霧障猶塞衢北風吹鴻雁集霰方載塗驟寒忽中人
刀箭森肌膚啾啾籠中鳥戢戢釜中魚畏子不敢奔引
領歌大車翻羨赭衣溫猶得生須臾骨肉任爾睽田園
任爾蕪鄉關不可見望眼雲模糊大官方持律剖析窮
錙銖問爾歸何期臘盡歲且除朝餽不果腹苧衣行亦

無太息亭衣人爾曹眞何辜

小兒歌一

連州民好訟思所以化之程含章作歌授小兒俾家喻戶曉

小兒歌小兒歌歌詞雖俚義不訛非有大冤莫好訟訟庭之下冤情多漫說青天分皂白世上幾個包閻羅公差如虎吏如豺行行色目須安排一言不合官人怒鞭撻紛紛雨點來飢寒病瘵困牢獄母妻間視門不開小兒歌汝聽止有錢者生無錢死從今莫聽訟師言留下田園與孫子

小兒歌二

州民多輕生惜命圖賴復作此歌

嗟爾愚夫婦輕主實可傷小忿胡不忍服毒懸高梁汝

死亦徒死汝命誰與償借屍肆圖賴搶掠搜篋箱打門
破屋壁兇狼如狼羊頽風胡不挽毋乃廢刑章刺史今
執法威令嚴加霜作歌告爾衆毋自取滅亡

省訟

屠倬

小兒習驕縱頑劣無不爲豈翳孩提性父兄實誘之循
循譏規矩督勸資嚴師有時不率教聊以夏楚威愚民
蹈法網厥咎如小兒飲食亦興訟所爭或刀錐弟兄有
交鬩鄰里有相欺肇釁乃至微厥罪且重罹長官民父
母家國無異施有子誠不肖甯改父母慈何爲獨於民
而不一致思苟能正其本赤子皆良知宥過與刑故信

之使不疑。以漸格其俗。孝弟實始。基方今 聖治隆民
氣固未漓。敢效俗吏爲挾。摘毛與皮。古有循良吏爲政
不尙奇要。當培元氣。刑措庶可期。

潮風打怨家

懲械鬪也。潮俗强悍。負氣輕生。小不相能。動輒鬥殺。名曰打怨家。非條教

口舌所能禁諭。勢積重而官則權輕。是宜威克乃允濟也。

黃安濤

打怨家有何怨。有怨胡不訴官衙。睚眦輒爾兵相加。壯
丁在前老弱後。籐牌鳥鎗卒然湊。今日鬪明日鬪。彼洞
胸此絕脰。一鬪紛紛如怒獸。殺人者誰莫窮究。官來彈
壓空寨逃。祠堂屋宇點火燒。出此下策真無聊。亦有調
停兩和懌。反覆無常旋搆隙。小懲大誡終何益。烏虜安

得十萬糗糧三千兵制事許以便宜行三月以往可使蠻村懾伏民無爭

潮風之五

買輸服

哀被誣也潮俗非命死者其家每置兇徒不問輒告儒而富者爲索錢計

欲壑既滿大讐亦忘出錢者名曰買輸服弱肉強食傾家有之

又

買輸服爾何因纍纍鬼頭銀銖積多艱辛乃甘跪獻誣控之家人殺人是甲不是乙甲乃窮子乙富室擇肥而噬奇貨居一棺肯蓋千金軀慳囊破出無奈強者歡娛弱者賀岸上餓虎飽水中饑鯨饒可憐有冤不自直口中石闕碑長銜

潮風之六

宰白鴨

憫頂兇也潮俗殺人眞犯輒匿不出而被誣者又惟怯不自申理率買無

業愚氓送官頂替貪利者罹法
網焉名曰宰白鴨是可憫也

又

宰白鴨鴨羽何襍誕出生入死鴨不知鴨不知竟爾宰
纍纍死囚又何罪甘伏籠中延頸待殺人者死無所冤
有口不肯波瀾翻爰書已定如鐵堅由來只爲香燈錢
頂兇者多孤子無依所得身價彼謂之香
燈錢以死後旁人爲之繼嗣接續香火也官避處分圖
結案明知非辜莫區判街頭血濺三尺刀哀哉性命輕
於毛勸君贖尾慎畫押就中亦有能言鴨

潮風之七速弔放惡榜贖也潮俗不逞之徒每結黨擄
人關禁索賄甚有凌虐至斃者被害
訴牒必籲曰速弔放以人爲貨甚
于盜賊是可惡也能惡之者誰也又

速弔放情辭哀叩頭向縣官火急鄉間來老爹如不來

阿總尙可使

潮人稱官爲老
爹皂役爲阿總

速弔則生遲則死贖還者

多弔放者少忍氣復吞聲羣凶婪肚飽窮魚脫網鷺鳥

嬉不加誅殛官何爲試看被擄人鳩形鵠面生理摧虎

狼之穴木鷺積成堆

擄人者每以堅木鑿兩
穴鉗其足名爲木鷺

吳中
吟 凍死囚

周 羸

朱門酒肉臭路有凍死骨一歌杜陵詩悽然淚交曉五

侯貂裘擁四姓瓊筵設圍爐促歌舞云是賞風雪豈無

僵臥人亦有索米客里巷微時交飢寒久割席何況圉

圉囚銀鐐繞身鐵心肝凍欲裂飢膚凍欲血論死恩未

施凍死冤常結

息訟篇示邑人

邵堂

蟬聯條約文煌煌鼠牙雀角毋上堂長官階祀施行馬
桎梏桁楊列堂下當世不遇包閭羅羅鉗吉網誣伏多
縱使神明片言折已糜金錢飽廝卒枷鎖銀鐐繫公府
吏如毒蛇胥猛虎敝衣質錢苦不足田園揮手空杼柚
汝今莫聽刀筆言汝所訐控非奇冤豆羹簞食各殫屑
但忍須臾萬事滅

慎刑篇

楊慶琛

縣官最與斯民親虛堂懸鏡臨如神父母髮膚戒傷毀
嗟哉三木囊其身罪之所積殺無赦要當情法持其平

世俗救生不救死 聖皇垂戒常諄諄我從觀政入秋
曹削瓜面目寒如冰十年親鞠要囚獄得情彌復生哀
矜湖湘陳臬總憲典桁楊刀鋸傷聞聲杖笞尙不輕嘗
試奈何重典戕其生故出之失等故入竟令死者冤難
伸屬吏決獄多憤憤輕重委之幕中賓大聲疾呼告屬
吏用刑詳慎銘諸紳

羅雀悲

獄囚爲獄卒所虐余於風雨夜輒往視懲誠之爰賦是詩

張維屏

羅雀悲苦渴飢豈惟渴飢手足繫維

解一

黑漆卑溼罕

見天日頭聚蟣蝨衣不蔽膝雨楚風酸助鳴咽

解二

中

宵不能眠念之心惻然風雨籠燈突往視獄卒可惡囚

可憐立懲獄卒加笞鞭

三解

越日呼之使來前爾曹造

孽須痛悛衆囚有罪在地獄爾忍苛虐圖其錢試看頭

上蒼蒼天

四解

勸息訟詩并示諸生

趙玉鏘

憶昔趙義門孝友情何篤禮教久陵夷健訟成澆俗骨肉啟釁端無非爲布粟兩造本一家忿爭直與曲計較及錙銖竟忍傷手足宰官難辨明積年留疑獄翻增狐假威囊橐飽所欲嗟彼愚無知自甘受桎梏何乃庠序人縣庭亦僕僕刀筆肆囂陵儒冠早玷辱我願邑諸生身受名教束誼正利不謀自然篤親屬根本旣克敦文

藝始足錄否則四維亡法網終自觸訟凶是格言盡共
聽忠告

聽陽朔訟

何俊

太守坐堂上下來陽朔氓二人各持牘莫氏實弟兄問
兄爾何訟阿弟實不情弟雖實不情友愛則惟兄問弟
爾何訟阿兄爲田爭兄旣爲田爭何不讓於兄皤然老
母來曰季實不仁季旣繼諸父反噬求重懲母旣求重
懲官法詎肯輕杖季季痛楚豈非爾所生良言發天性
旣悟爭已平垂涕願還牘三口同一聲

哀癡兒

憫冤也

粵中吟之一

戴熙

東家富兒狗食肉西家貧兒人啜粥富兒一朝怒殺人
縣官急捕驚四隣貧兒不願生富兒不願死不如鬻身
代爾死白鏹觥觥媚妻子上堂對簿氣象豪行歌一曲
來市曹貪夫殉財古亦有似爾性命真如毛吁嗟乎城
南枯骸寒無柳寡婦嫁人孤兒哭

新樂府
領硃籤

銘岳

出硃籤雷火風雷威火猛風行空領硃籤風火雷風旋
火轉雷轟虺籤上名多俄隸喜指名大索喧閭里城門
失火池魚殃富家酒譙貧銀鐺望望青天號復哭官衙
如海官如木辨冤容易見官難老饕不飽無傳單

新樂府 押班房

又

押班房班房亦可押雀鼠之爭魚鷺不狎暫用牢籠使
民怯押班房班房不可押免罹羅兇入押不畏官法畏
私法虎頭牌風火雷一一龍門點額回堂上久忘點鬼
簿屋中已築望鄉臺招魂人去聲哀哀

盜賊

綠林豪

錢澄之

江頭來往綠林豪弓箭在手刀在腰門裏劫商門外坐
捕捉公人當面過殺人打貨上船行人人知是食糧兵
箭簫分明記名姓官府朦朧不許問君不見西家被劫

報官知合門拷掠血淋漓。

錢澄之縣門行見兵卒門

邏卒歎

方拱乾

西湖自古多明月錢塘門鼓黃昏發士女齊拋簫管船
如何月減湖光歇近來新添騎馬兵湖烟未黑斷人行
土音全操關東調金丸亂射驚鴨驚富家有租收不得
田夫捉主賣送賊五金十金百千金贖歸還恐官司識
高樹柵門防賊走賊反鎖門置人守前宵橋東殺牛兒
昨夜溪邊賣米叟城中有兵雄且都賊去山中兵在衢
煌煌鐵馬四百驂縛得倡家兩博徒

擬秦雞犬
中吟

誠諱盜也

張英

雞犬不收戶不閉休哉此風誠至治或駕單車賊壘清
或縫綵線渠魁斃能使桴鼓長不驚漢家京兆稱能吏
不聞上避考功法聞雷掩耳成壅蔽年來水旱多窮民
荒村雞黍無甯歲老翁匍匐訴縣官未語吞聲先出涕
縣官無端怒且噉案頭老吏識官意區區爲爾稻粱謀
誰肯明廷干吏議吁嗟老翁夫豈愚翻然搖手向官吏
昨夜荒村犬不吠老翁抱孫且酣睡

捕賊行

爲侍御
夏公賦

汪懋麟

邑小山荒舊多賊鴟梟亂啼林晝黑官吏束手不敢捕

國朝詩集 卷一
驅捉殘黎苦羅織井里蕭條人跡稀二三老稚無完衣
戶籍雖存半爲鬼流亡竄徙何時歸公曰吾民豈爲盜
單騎夜馳走相告賊黨羅拜涕泣陳自此鄉村不爲暴
紛紛良民買犢耕齊道我公神且明空城忽增二萬戶
四境但聞雞犬聲治盜從來重良吏渤海會聞得龔遂
但使開誠復革心翻笑縫衣亦多事

估客泣

邵長衡

何處估客強廣州估客強裝寄巨觚四角幡珊瑚玳瑁
五木香珍珠百斛載中央解一鼓隆隆二更斷毘陵驛
邊鳴號箭何來探丸少年拔刀跳盪無前倏歛龔炬燭

天官兵城上視城下口噤目眙不敢前

解二

珊瑚玳瑁

五木香珍珠百斛載中央一一席捲去但去莫計量

解三

持牒訴縣官縣官不爲理訴太守太守卻案不肯視

遙呼罵蠻奴今時太平安得有此估客吞聲淚瀰瀰

解四

賣柴翁

顧嗣立

賣柴老翁六十六旁行偶僂頭髮禿閣閣柳聲孤燭搖
帶絮披氈蹲矮屋自言今年田稻歉秋成遂使陸梁小
醜黃昏行大官嚴令申保甲柵門添置魚鱗接西山日
落斷行人當街不敢收鷺鴨前夜街西火燄流昨宵羣
嘯城南樓倒騎屋山入閨閣珍珠玳瑁落臂鞲長街寂

靜月如水十五五公然遊金吾兜牟舞駿馬劈面驚
回伏鞍下。須臾賊退始張威。攔街呼喝平民打。打平民
莫敢陳嚴夜禁立法新老翁無嫗又無孫里正驅來守
柵門三十青銅博一夜更長頭眩目昏昏近聞官兵號
令肅冀得下鄉殲鼠族安排布被折鐺邊一覺膏騰眠
破屋

峽山行

先考功令山陰時鼎革初定山賊竊發民

剿滅先考功馳詣武林請於巡撫蕭公上官方議
自任遂從二小吏乘扁舟至峽山直入賊營諭
以禍福衆皆感泣羅拜誓爲良民先考功書其
名於籍給以免死牌而縱之復榜窮鄉諭令自
新餘黨皆向化復命蕭公全活數萬計迄今五
十年矣峽山父老爲嗣立追述往事咸欲歔泣

下嗣立因賦是篇歸
示子孫以補家乘云

又

白波如鏡光新磨兩山雨洗青嵯峨綺紛阡陌接衡宇
峽山一村同姓何我行訪友榜村口市聲風攪炊烟斜
閭閻老幼步蹒躓太平雞犬無諠譁二三老人向余語
銜淚敘舊雙滂沱維昔順治歲在子四海渾一收天戈
妖氛餘孽聚山谷孤鳴梟噪張爪牙槍竿纏布白帕首
剽掠倉囤喧官衙十家被害九家哭僵尸積路如亂麻
撞金擊柝號團練兵民與盜誰分科茲地環山更險惡
逋逃屯聚爲巢窠羽書如電上州府官兵調發疊鼓撾
昆岡火炎焚玉石吾族噍類窮奔波賢哉吾侯來何暮

泣事三日驚傳訛侯曰此皆吾赤子縣令不救理則那
日行三百謁開府爲言若屬良民多或誑其兇或誘餌
赦之詎卽非農家一弦一矢請勿用掉三寸舌聽凱歌
親書供狀百口保甲兵手洗翻銀河因乘扁舟從小吏
波風吹帶紋如韉旌扛刀槩森牆堵林巒兵氣騰嶺呀
從吏見之正股栗吾侯氣壯朱顏和爰召賊酋告之曰
汝曹獨非人情耶紡績耕耘各有業婦依夫壻兒隨爺
奈何違性陷非僻矜凶挾狡開呀呀撐骸剗脯就屠戮
鬼村啾唧堪咨嗟曷不從我悉歸順各安田畝閒漁蓑
侯言未終盡感泣抱頭拜舞髮鬢髹丐汝死命賜之酒

投戈棄甲爭紛拏千村萬落夜聲靜水田但聽官蝦蟇
迄今相距五十年生男生女攢髻了君看家家大作社
鑄金禱祀陳華奢宗支蕃衍誰之力君家汪濊恩靡涯
嗟余懷紉早失怙靈運述德慚么麼偶尋山水到茲地
先人厚澤彌深遐台之家乘與邑志目見奚啻百倍加
援筆聊作峽山曲傳諸子姓千秋誇

江右紀風不種田

湖鄱湖者險在秋冬揚湖左里之民利在溺焉

商盤

揚瀾左里不種田一生好搶失水船彭蠡風濤天下惡
湖中壞船多水涸獨有揚瀾左里民正喜風濤日日作
豈無救生之役防汎兵分財掠貨同橫行亦有周溪渚

溪兩巡檢呼應不靈。扑不敢鳴呼。利災樂禍。神所誨太。守不禁理。則那賣刀買犢。猶可教左里揚瀾。本非盜。

捕賊人

貢銘

奸民窺伺。夜作惡穴。牆直入鄉居。房恣情採取。蓋藏物。家家守夜。人隄防。鄰村巨猾。更招集坐守。屋舍分餘。賊。昨聞東家暗緝。獲縛之。直送縣門。旁捕人欣然。快得意。更索酒錢。循舊例。不加鞭扑。賊安然。主人錢盡。終無濟。明日公然下鄉村。得錢還送胥吏門。

題于清端公紀績圖市肆微行章 沈德潛

金陵帝王州。繁華甲諸郡。莠民雜其間。奸宄日豪橫。長。

官惟營私有罪何暇問公來迅疾行雷霆強梁惡少難
藏形巨魁投竄餘譴責兒童婦女稱神明公從何處得
踪跡傳說市肆常微行戟門晨開喧角吹驄馬行來衆
人避愚民爭看眞青天咄咄如聞詫奇事白鬚顏顏一
老翁前宵共飲屠沽中

百一詩之一

又

南方多暴客殺奪爲耕耘犇刀裹紅帕行劫無昏晨事
主訴縣官縣官不欲聞朱符遣悍吏按戶拘四隣保甲
及里正銀鐙入公門鞫讞恣撻辱需索空雞豚盜賊實
遠颺株累及衆人縱虺虐鰥鰥主者何不仁前年中丞

公志欲窮其根峻法緝湖寇遠慮防海氛一從彈劾歸
若輩彌紛綸遂令湖海間屯聚如飛蚊吾思牧民術先
威而後恩治弊用重典古人之所云霜雪旣已加相濟
在春溫鋤誅豈常用盜賊亦平民

警捕人之虐

郭廷翕

流民便作賊迫於不得已捕人亦作賊何說以處此世
上流民尙可數捕人林林遍官府捕人安樂流民苦
捕人養賊如養鼠縣官養捕如養虎虎掠食人官不識
知而故縱虎而翼鼠鼠兮鼠兮何足道有虎有虎當道立

歸州紀事詩

梁谿詩鈔序曰任歸州時按捕巨盜張紅貴等旣成讞臺司堅持不可勢

且反坐禮堂屹然不動事上聞特命使鞠之
盡得其實禮堂以是受上知去歸州日民歌
曰良司牧去何速大盜除
萬民福半年官恩膏足

秦 鑠

歸州衙前筆架山歸州衙後將軍山背山面山衙鼓發
三峽之水聲潏潏嗟予到此甫三月悲生風木涕淚潛
官事羈身未及代荏苒忽起何凶頑地名塊石爲窟藪
窮谷深岩產稂莠習符煉法結匪徒鐵牛護身破枷杻
一門四惡稱巨魁張紅貴張楚望張玉堂張紅順水儒包容亦已久黑
面紅衣挂長鬚昏夜招呼集羣醜明火持刀叩門戶老
婦驚啼少婦走主翁就縛恣拷掠倒篋傾箱始脫手除
暴安良 國法昭茲事驚聞那可宥翁婦長吁意慘傷

國朝詩鐸

卷一

盜賊

三

誓不鳴官泣臥牀去歲東村被劫掠放盜歸山何獷狷
囹圄長羈待遣戍官法倒置理不常桎梏吞聲死萬里
不如默默守故鄉我聞此事心已惻况聞此語增太息
墨纒從事淚霑濡執法鋤奸是吾職筮神卜吉知盜蹤
道卒分拿限時刻盜既得錢宰牛羊有肉如林懸屋梁
娶婦入門羅酒漿賓朋雜坐斟滿觴釵環在首身衣裳
徵媒過聘皆盜賊突來州牧與游擊選壯傳丁擒虎狼
一盜知死魂沸湯絮被蒙頭氣不揚二盜伏地悄無語
倉皇泣拜惟老娘鐵索擊頸牽就道觀者羣呼天理彰
是時亢陽雨遂沛甘霖足慰蒼生望甘霖足慰蒼生望

世道人心不可忘

新灘書事

蔣業晉

上灘之難如登天千夫力挽一綆懸下灘之險疾於箭
奔波直下逐流電行人到此心膽驚性命眞比鴻毛輕
灘邊最能最能水手名也少少有最能行慣入水不利人生利人死昨
客不戒沈厥舟誰與援手心煩憂有人翻身卻援手攬
得錢刀撇波走走歸召黨酒相賀日夕駕浪伺船過

紀盜

孫士毅

短檠滴雨檐無豫曲彖牀中正擁絮統如街鼓聲乍停
探丸暴客來何遽重垣立毀更打門蜂簇蟻屯不知數

列炬儼張太乙軍吐氣便噴蚩尤霧廟中裹首足妖芒
櫺具橫腰森武庫自言五步能殺人京兆聞名不敢捕
主人縮伏如凍鷺目眙口噤足僵暗子敬空留座上羶
仲容并乏竿頭袴戍卒倉皇卻不前一任羣呼整暇去
逸者漸遠追者驕故作虛聲驚里嫗當途錯愕立限程
從事遷延終負固維虎有俚雉有媒毋迺奸胥實調護
鼎湖萬竈埒通都吁嗟邨落那可住側聞西北方治兵
光祿塞邊稽首附遐荒之寇盡掃除卻怪門庭滋隱蠹
捷書旦夕報神州草澤豈容仍嘯聚星星之火涓涓泉
不憂一家憂一路擬排闥闔叫九閭轉喉恐觸長官怒

囑嚕曲

頌黃制軍也

囑嚕本音國魯蜀人呼賭錢者通稱呼作平聲行常

帶刀短曰線雞尾長曰黃鰭尾皆象形而名內分紅黑書曰紅錢如剪結割包之類夜曰黑錢如穿牆鑿壁之類或三五成羣或百十成黨少則劫奪孤旅多則抗拒官兵蜀中為害莫此為甚公名廷桂漢軍人自公制蜀此輩斂跡及去無不望公再來也

李調元

黃鰭長線雞短青天白日兵戈滿黑錢去紅錢來山橋野店雞犬哀殺人不償命皆冒古名姓夜來假面劫鄉民平明縣堂充保正刀為益州劍為閣天胡不將此輩戮安得再來關內侯盡使帶牛兼佩犢

魚蠻子歌

楚江漁者連船數十無論晝夜截流而子也坡公謂其不耕有餘以為至樂深幸之也

近日此輩千百為羣多為劫盜大吏因嚴夜漁

之禁亦未盡遵故有感而作歌雖仍蘇詩舊稱而命意則與坡公異張雲璈

魚蠻子生長風波不畏死平生似與魚爲仇不盡江魚不肯止羅罌慘木排中流如山白浪天邊浮扁舟爭與浪高下一網截斷瀟湘秋此曹豈必無性命事有所託拌生求以身居險心更險取人每作荏苒謀雖然以是爲世業中藏叵測難窮搜大府知之嚴令甲不許深宵相混雜果能出入盡有稽縱有探丸敢陰挾恐有治人無治法嗚呼恐有治人無治法

摸稭行

宜城縣下流水溝村落間有村老人爲余

人夜則縛以入其里使之以姓名掩門門啓卽殺先縛者而又縛此人入其室搜殺已卽又以

所縛者叩隣之門門啟亦如之搜殺盡一村人
無覺者謂之摸樁云傷賊之黠哀民之易屠使
賊滋蔓也因

作摸樁行

彭淑

夜半黑風吹怪雨前驅豺狼後猛虎鵲鵲嘯羣作人語
妖狐頭戴髑髏舞犬不吠雞不號鬼伯叩門求其曹以
火來照揮霜刀殺人如草無喧囂東鄰殺盡西隣及問
客何來開門揖千門萬戶排闥入男婦駢頭但柴立尸
骸撐拄如邱山祝融入夥飛炎煙以人爲燭光灼天羣
魔血牙飽腥羶千牛炙萬石傾上馬捫腹腹彭亨平原
廣廣縱且橫不聞哭聲聞笑聲摸樁摸樁在何處千村
萬落條條路白蓮花死不迴顧搖旗打鼓前頭去

過石灣感上年捕大盜何德廣事 吳俊

殺非可爲政不得已用之彼有回測志謂我不能治十
百散川數一呼而羣隨探囊兒戲耳殺人涎流頤戚戚
守與令誘捕無所施黷哉鄭子產其言不我欺水儒故
多死噬臍良已遲縛虎必入穴斬蛟先壅池石灣上中
下三村自逖迤蹂躪及禾麥欺侮到鰥寡篝火聚一室
四鄰不敢窺時惟大除夜月晦星迷離密請大府令急
遣八百師開城更四點疾走無人知乘其淫且醉布我
網與機周遭四十里搜縛將靡遺人心憤貫惡天道憐
氓蚩殺一以活百姑息非慈悲獄成磔其桀餘梟遞有

差此事小不愼難免成瑕疵兵凶忌嘗試行速滋駭疑
罪人幸斯得愉快翻嗟咨辟也欲止辟書以告有司

放鶉鴿

王蘇

賊充捕捕養賊衣賊衣食賊食縣官捕賊賊不得豈知
賊在捕家匿賊如短狐捕如蛾夜深與賊傅兩翼穿人
牆屋掘門闖被擾之家勢孔棘清晨告長官官問游徼
卒卒言諸穿窬悉已繫徽纆烏能出門作蠡賊失物之
人語頓塞蓼蓼鼓動賊四合攫人衣物到牀榻始知捕
家夜夜放鶉鴿

查保甲紀事

唐仲冕

吳江澤藪多荏苒張田楊港各一區力編保甲仍履勘
初至渭字稼字圩港南港北徧蒔蕩雨圩之民多業漁
漁者夜出曉歸舍蹤跡未易窮根株立竿牽繩日晒網
夜爲柵欄周其廬其船往往銳而橈穿濃收隄如馳驅
始焉肆竊繼行劫吏或縛取難駢誅港外設柵幾出入
時復網漏吞舟魚長船改截秋扒式漁目編烙戒勿疎
到今行旅與富室尙苦囊篋遭探拏我來逐戶按其籍
或先伏法或外遁所存二百八十戶示羸匿壯防追胥
東南更有房字圩夾岸貫字比隣居其南暨北戶三十
置屋不與楊港殊門戶雖別內通合捕者欲逐空踟躕

昔時楊港有淫祀木偶旣沈宮已瀦今移張田臥雲寺
夜聞官至負以趨朝來追詰出二塑二老面白三老朱
手持黃金僭冠服視前沈像殊相符羣言卜筮供酒肉
急則陰佑踏船呼此祠建自毀祠日急令碎之堂階塗
封鐫寺門杖守者隔別牆宇判里間爲生自可足蟹稻
嗟爾莠民宜滴除

縱賊行

程名世

縱賊不捕賊不息夜夜村鄉防盜賊鳴金擊柝盡虛聲
有賊來時反逃匿東家昨夜直入堂西隣今夜復踰牆
里正持錢來慰語嚇人慎勿到官府

洪州 捕湖盜

羅安

何處捕盜去捕盜鄱陽湖鄱陽距洪三百里羣盜於此
多亡逋沿湖上下盡商舶白衣搖櫓誰猜渠翻空巨浪
蔽楚吳朝散暮聚嘯孤蒲官吏躡其後望洋輒驚呼揚
帆瞬息隔南北雖欲蹤跡知焉如豈無汛卒與巡邏眞
盜反縱僞盜拘今年府牒稽民籍漁戶九姓編如律徒
有治法無治人良民擾擾苦多役捕盜去盜棲萑苻宜
急捕索盜不必索漁戶。

嶺南 海盜

粵東海面分東西中三路並有舟師防
禦南風盛時盜從安南大洋連檣而至

西路商舶最先受害
洪濤出沒甚難捕獲

樂鈞

山盜如狐狸海盜如鯨鯢巢穴遁逃易焚掃波浪出沒
難擒圍此徒半出安南國門粵亡命亦從賊白艚狂趁
西南風五月商船行不得頗聞西路豪富民婦女兒童
多盜羣買船借盜權子母一家晏坐收金銀漁人捕魚
出外洋暗中往往齎盜糧此皆盜源盜羽翼兵汎懈弛
官難防鎮將終年駕檣艣時捉海盜送大府東市懸首
方纍纍又報商船被搶擄洪濤萬里連番夷蛟官廳窟
雲迷離塞海口有佛郎機發聲如雷盜不知

除盜賊

安南吟之一

李宗昉

鄭僑古惠人有時如火烈荏苒盜爲患剗除盡遺孽南

賴昔盜藪林洞競突竊有明王文成搜討絕萌孽幸逢
聖明代太平安吟噉豈無穿窬者晝伏夜攘竊甚則晝
掠金通塗逞蹄趺近時輿貨蕃嶺路多輒輓岸邊劫孤
舟底洞嗟漂漈當彼鼠竄時猶易尋窟穴鄉愚利其資
隱忍不敢說吏胥藉牙爪攫取恣詭譎縣官方得意此
境無告訢何知巖谷間姦宄日膠結呼籲坐舉主聞者
心膽裂亦有避吏議不如取容悅解盜縻金錢客盜安
蹇拙但保腹不潰勿卹偶瘡癰不知長繩朽引之終必
絕其絕必有處詎得保庸劣告爾弭盜司除盜在剛決

白撞歎

徐謙

白撞手胡爲來幼失教長不才嘖嘖自誇好身手假兄
假弟結匪友狹路攬錢財眈眈勢如虎一旦聞搜拏皇
皇竄如鼠銀鐙貫索入囹圄階前匍匐淚綆雨桁楊加
爾身鞭笞加爾股流徙遣戍別鄉土耶孃妻子走相送
尙云爾惡髮難數爾但低頭赧無語白撞手亦何爲飢
寒相尋死且隨躑躅萬里將倚誰今日雖悔不可追假
兄假弟安在哉白撞手徒爾哀

己巳紀事

張琳

歲己巳八月盜掠乾涇村艤幢比如櫛礮擊雷殷天夫
豈無官軍遙望不敢前村民競奔竄痛哭紛喧闐一身

不自保金帛盡棄捐可憐紅顏婦驅繫歸盜船盜已揚
颿去兵來搜雞豚哀哉富庶地十里無炊煙

道傍黃口兒頓足掩面哭問兒哭何爲吞聲爲予告賊
初來鄉村勢等虎狼酷脫身幸先逃屏息草間伏遙聞
刀斧聲天半火光燭賊去潛來歸赤地慘心目兄嫂被
俘虜命屢遭殺戮死者不能葬生者誰爲贖孤子一身
存露處已無屋腹忍三日飢何人飼饘粥

博羅縣

吳慈鶴

孤城抱青山蕭蕭百餘家昔爲神仙居今有虺與蛇民
貧性命輕地大耳目遐作奸犯科事何由達官衙頗聞

探丸起散亂如驚麋殺人亦擾糲食肉無爪牙大府擁
萬兵未肯一矢加殺賊相公怒我民死如麻潏潏石龍
江清水爲赤沙肉旣飽豺虎血猶醉魚蝦彈丸雖未破
四野無犬豕嗟爾人何苦不如萇楚花

羅浮婦

又

哀哉羅浮婦白日哭道塗其詞雖拉雜聽者盡踟躕婦
有父與母婦有姑與夫婦有離乳兒玉貌聲呱呱一朝
山賊來親戚盡宰屠兒旣供賊飽婦亦遭賊汚中夜幸
走脫寃讐忍模糊因來縣官城得瞻相公軍叩頭懇所
苦相公亦辛酸城中多降虜婦昨遇其人背有免死字

手有朱提銀婦家悉殘破彼獨逃誅刑讐恥無不報白
手搯其膺相公雖盛怒婦不與俱生誓剗賊心肝祭我
地下靈

歸善縣

文

兩城插旌旗竟夕響刁斗四郊已烽煙城爲官府守憶
昨搶攘間茲邑實禍首海隅多妖民十百扇隴畝奸卒
頗應之意欲劫鍵牡夜半歆血盟烈火燎原阜太守上
其事激切淚灑肘雖邀相公來未肯按誰某一狼付湯
燖衆虎放林藪兇淫無鬼神殺戮到童耆熒熒瘡痍民
忍飢荒谷走賊從草間來欲語刃在口甘爲彊死魂噴

血射賊首

派尾墟

又

晚過派尾墟。一老倚僵樹。似經喪亂深。嗚咽向我語。賊去兵始來。賊來兵已去。茲村山谷間。兵賊偶一遇。其時秋八月。白晝響刀鋸。民屠骨肉腥。賊飽飛揚遽。幕府遣諸將。將來惟空村。稍稍剩錢絹。往往逢雞豚。貪卒競攫取。賊起忽如雲。倉卒不相救。勇夫變秋魂。幕府甚寬大。厥罪不復論。兵敗由自取。民死一何冤。遺我窮獨叟。慟哭收子孫。

八圻行

沈起潛

吳江有塘名八圻往來行李如絡繹水路平通吳會船
陸程近接金闕驛有客云自平川來一舟滿載多貲財
到此停橈日已暮苦無僕從相追陪原知慢藏終誨盜
低聲私向營兵告今夜無忘擊柝嚴詰朝定有多金報
幾度丁甯始下船坦懷無患高枕眠南柯一夢不復醒
那知此夢長遊仙賊舟猛於虎抽刀剗肺腑血肉六截
分金銀滿囊取營兵怒號白刃急操追及十里賊無可
逃雖報讐人獲重泉命難續恨血千年江上紅游魂半
夜船頭哭我亦孤客樓頭艙一葉飄泊蘆中央尋思此
事不成寐篷窗獨坐徒徬徨吁嗟遠遊道何如在家好

行路而今難更難孤舟孤客摧心肝

沙井兒

陸麟書

江頭日落黃雲低沙井小兒掩面啼阿爺報竊入城去
官中拘繫如籠雞家無長丁孃饋飯留我守舍羣兒欺
今晨陷芋纔半飽日暮待孃來煮糜出門遙望過兩槩
謂當是孃近復非悲風蕭蕭浪漸惡孃縱欲渡愁船稀
萬一并孃幽隸舍苦我更向誰啼飢早知縣官惡聞竊
不合浪訴干嚴威如今不願官捉賊不願追取箱中衣
但願爺孃攜手歸有牛任賊自牽去有穀喚賊來同炊

患盜

甲辰冬作

柳樹芳

古之爲盜者往往由飢寒今之爲盜者飽煖事宴安錦衣而肉食入市長遊盤有時樂爲盜性命全於官不然竊鈎誅吏胥不我寬此風效尤衆黨結河之干一呼動千百退據深山蟠國家幸無事磐石如蜂攢養疽漸成癰一潰身易殘誰爲醫國者勿作常疾看

羅墩行

王文瑋

殺人之賊常紛紛殺佛之賊今始聞不知惡賊行詭詐佛且殺之人益怕西江勝地羅家墩今年夏五賊帥屯將軍九江馬戰死刀創滿按劒而嘖及世尊其間花石多焚毀江邊齒豁隨流水破垣縷縷過炊煙窺客殘僧

面如鬼山門彌勒誰噬齋此中空洞無所齋衆阿羅漢
指可掬金身剝落惟塗泥怪鴟忽啼凜然出痛心烽燧
銷何日人與世尊同此劫努目金剛救何術君不見斷
頭將軍斷頭佛

樂城紀事

桂超萬

衝要車徒來宵小易溷跡五里二野廬遣役往潛緝健
僕住兩頭信義籤當符檄以兩家丁分住南北交界更雪
月出雲梢孤城萬家寂策馬我親巡寒柝碎空碧鐵面
冰凝鬚粟肌風伺隙執轡手全僵狐裘猶顫栗况爾徇
路人鶉衣偵永夕

守更謠

于源

官軍畏寇民畏盜。夜夜梆聲滿街鬧。維以胡笳發哀叫。
今夜東家昨夜西。家儻有警急喧入官衙。山東潰兵綠
林客久滯此間。豈長策中宵愁看城頭月。

東鄰行

夜有偷兒入室家人繫之將召里正
鳴之官大父命釋之椿謹述其意

褚逢椿

東鄰夜驚呼。西鄰燈四集。須臾聞縛人。舉燭照顏色頓
地。但乞憐囚首。面深墨。自云好賭錢。家徒四壁立。老母
頗愛憐。惟願寬拘繫。或曰歸之官。訟庭可窮詰。或云不
如鞭庸何傷。一扶翁言衆勿喧。子來前且息。天地生一

人各有養生術。子今方少年。臨財冀苟得。或者荒於嬉。
不自食其力。我家舊青氈。不足應子急。頃爲屋上烏。今
爲禪中蟲。家中有親乎。得毋倚門泣。悔過猶可爲。比匪
愼所惑。去去勿復言。叱奴緩之。逸盜賊本良民焉。用太
相逼。

奈山行

道光乙未六月徐德興於奈山遇盜水手趙坤亮朱凡信等被戕賊此弔之

王慶勲

奈山蒼蒼海中央。海水卓立雲飛揚。嗟爾乘風破浪何
至此。冒險謀生可憐死。錐刀之利能幾何。性命一擲隨
風波。孫恩盧循忽相迫。潑水刀光飛霹靂。剝腸截脛恣

狂兇熱血淋漓滿船赤就中健兒趙與朱魁梧狀貌與
衆殊短兵相持勢不敵可憐竟喪昂藏軀受傷者半匿
者半踰伏盜旁空憤惋父母妻孥了不聞片刻之間人
鬼判吾歌且悲還起舞風湧潮來怒如虎潮聲風聲聲
聲不平一唱三歎百感交并嗟爾乘風破浪何至此冒
險謀生可憐死

干振行

夏之盛

椰橐橐鐸瑤瑤市燈初熄夜未央三更星斗照衢里鬱
攸警早知鼠盜跡亦弭四更月上譙鼓寒小吏瑟縮迎
大官大官歸小吏散冷巷偷兒喜呼伴

建陽樂府江湖

惡盜也

建陽多盜盜以江湖爲師江湖者盜渠也

鄒志路

平頭會雙刀會姦宄草竊此爲最南槎司北雒司頑民多拜江湖師煌煌令甲若無覩嘯聚公然盛儔伍焚舟奪貨崇陽間滿地江湖困行旅誰與詰盜勿憚勞翦其羽翼殲其曹長使江湖恬靜無風濤

西藏樂府

夾壩來

蠻子結隊劫人曰放夾壩

夏尙志

夾壩來行人見之顏如灰羣山陡於壁捷如猿猱馳崔嵬一人嘯於前衆騎隨於後遙問客囊何所有有物脅以威無物褫其衣人苟或抗之不得令生歸告官長官

長謂爾何惘惘告土司土司謂爾何無知彼有羽黨數
千人本屬化外無知民捕之不勝捕戮之不勝戮九死
一生客還家無言獨自吞聲哭

渡江溯淮途中所見

鄒在衡

朝憂盜暮憂盜盜賊橫行吏莫告昨聞劫米船可憐骸

骨沈深淵今聞殺將弁屍棄水中血猶濺

有盜于丹陽五里窰殺捕

盜將弁劫盜犯

東南地是財賦區江村秔稻年豐腴如何盜賊

久充斥行人膽落愁長途君不見江南大好繁華數歌

管紅樓夜酣酒水鄉已作古荏苒醉夢鶯花尙虎阜

盜賊補

新造墟

張維屏

出城路人喧聽者或變色昨日新造墟破曉海賊入鄉
人早料此各自備矛戟相持成一閩倉猝勢不敵婦女
遭生虜火焰尤慘烈有客揮短刀殺賊計六七賊怒齊
奮呼長鎗洞客腋民心本非怯賊實恃死力豺狼誠披
猖得飽願少息兵來賊已去藥緩病太急紛紛居民逃
鑒此若前轍羊城太平久老不識兵革堂堂大吏在日
夕亟籌畫紀實爲此詩空言究何益

盜賊又補

贖人行

黃培芳

海上盜船動盈百東西南北候過客相逢礮火聲轟天
萬衆齊呼飛過船人人土色心膽裂短刀交下白如雪
盡掠財物兼捉人捉人上船佯怒噴奴顏囚首見板主
賊首稱號板主頭裹紅羅巾貧富詰罷各乞命千金百金贖

一身大呼紙筆作細字索取百物限淡旬逾時不贖剖
腸腹速寄家書歸至親與衣貨產并哀貸拮据措置潛
悲辛遣人入海與交易但得再活甯論貧更有細民居
海畔日日驚惶四道竄夜匿荒山洞裏眠晨歸破屋茅

中驪盜船惟向炊烟來奔逃不及遭羈絆老父留贖兒
放回速賣耕牛數虧半含啼鬻子僅取盈老父歸來苦
家散人亡財盡四壁空不死兇殘死困窮君不見兵船
西盜船東兵船候潮盜船乘風兵懦或退避盜衆還相
攻不恨兵船不得利但恨不見黃總戎

謂黃
公標